



22/32022
0

UPA2022/17

Naqqiut

Oqaaseqaat 22. marts 2022-meersoq taarserpaa
Naqqiummi oqaaseqatigiinni allannguisoqarpoq.

Uunga siunnersuut: Piniarneq aallaaniarnerlu pillugit Inatsisartut inatsisaat.
(Aalisarnermut, Piniarnermullu Naalakkersuisoq)
(Siullermeerneqarnera)

Tuttunniarneq uannut tassaavoq kiffaanngissuseqarluni inuunermik qujamasuuteqarneq.
Tuttunniarsinnaanerullu ammaanarnera ukiup ingerlanerani uannut pisuni annersarisarpaat.

Kisimiingilanga taamatut inissisimasartoq. Kulturitsinni piniarneq ilaalluinnarpoq. Kulturi eriaginissaa pingaarutalik kingulissatsinnullu ingerlateqqitassaq. Tuttunniarsinnaanerup nalaani meeqqat atuarfianni sapaatip akunnera atuangiffeqartarnissamut isumaqartunut ilaavunga. Taama pingaartitsigaara.

Maluginiarpara piniarnermut allagaqartaqarsinnaatitaaneq 16-niit 15-nut ukioqartunut appartinniarneqartoq. Aammalu nuannaarutigaa suli 12-nik ukiulli suli sunngiffimmi piniarnermut allagartaqarsinnaatitaanerit. Takorusupparalu inatsisip ersarinnerutissagaa 12-nik ukiullit inersimasumik ilaqartilluni tuttunniarsinnaatitaassasoq.

Aammalu tuttu piniagaanerisa piujuartitsinissamik aallaaveqarluni ingerlanissaa inatsimmi allanneqassasoq takorusuppara. Biologit innersuussutaaniit tuttu piasartakkagut ikippallaarput. Tuttu piniarnissaat nerisarinissaallu taama nuannarineqartigitillugit eqqarsaatigissagaanni paasiuminaalluinnarpoq ikippallaanik pisaqartarnerput.

Isumaqarpungali siunissaq piareersimaffigissagippu ikittuinnaat piniarneq inuussutigalugu inuusut. Qangaaniit piniarneq inuussutigalugu ileqqoqarneq erloqinartorsiorpoq, ineriartornerli niqueqqinnissaa ilimanaateqarnera annikippoq. Ullumikkut piniarluni inuussutissarsiuuteqarneq annertuumik ikiorsiussuteqarnikkut ingerlareerpoq. Taamaattumik inuussutissarsiut inersartariaqarparput ammaallugulu piniartut ilisimasartik piginnaanertillu atorlugu allatigut aningaasarsiuuteqarsinnaanissaanik.

Taamaattumik akiliisitsilluni piniartitsisarnissamut akuersissuteqartarnissamut aammalu akiliisitsilluni piniartitsinermit angallassisartoqarnissaanik akuersinissamut maleruagassanik sanasoqarnissaanut tungavissiinissamut siunnersuuteqarneq iluarisimaarpara. Isumatusaarneruvorlu piniarnikkut inuussutissarsiornermi aningaasatigut sulisoqarnikkullu pissutsit oqimaalutarneqarmata. Piniarnikkulli piffissaq tamaat inuussutissarsiuuteqarneq ajornartorsiorluartoq piniarneq kinguaassatsinni



suli kulturikkut ingerlajuartussaavoq. Puisit, umimmaat tuttullu nuna tamakkerlugu angerlarsimaffinni nerisassatut sassaalliutigineqartuassapput. Kulturitsinni akuusoq ima nukittutigaaq piiginnarneqarsinnaanani.

Taamatut oqaaseqarluta siunnersuut Aalisarnermut, Piniarnermut Nunalerinermullu ataatsimiitsitaliamut suliareqqinneqarnissaa innersuussutigaarput.